

Viši zamjenik visokog predstavnika, Matthias Sonn istakao prioritet Daytonskog sporazuma, koncepta odgovornosti i evropeizacije u procesu provedbe mira

Daytonski sporazum i promoviranje koncepta odgovornosti su spriječili da Bosna i Hercegovina postane protektorat, rekao je viši zamjenik visokog predstavnika, Matthias Sonn na međunarodnoj konferenciji koja je u utorak održana u Parizu. "Dayton sadrži strukture koje je Bosna i Hercegovina trebala da bi postala suverena i demokratska država", rekao je viši zamjenik visokog predstavnika. "Naglašavanjem odgovornosti domaćih vlasti, međunarodna zajednica je svjesno i postepeno tražila da se povuče iz područja u kojima domaći organi vlasti pokazuju volju i kompetentnost da rade samostalno".

Viši zamjenik visokog predstavnika se obratio na konferenciji pod nazivom "Humanitarne intervencije i rješavanje kriza: pouke balkanskog iskustva", koju je organizirao Institut za međunarodne i strateške odnose.

Viši zamjenik visokog predstavnika je rekao da je i pored stalnog i dugoročnog angažmana međunarodne zajednice u političkoj, socijalnoj i ekonomskoj sferi Bosne i Hercegovine, uspostavljen čvrst okvir koji omogućava da domaći lideri ostvare autoritet koji će im biti neophodan kako međunarodna zajednica bude smanjivala svoj svakodnevni angažman.

"Daytonski proces njeguje novu vrstu političke svijesti u Bosni i Hercegovini", rekao je viši zamjenik visokog predstavnika. "Ovo je bilo mnogo složenije i zahtijevalo je mnogo više vremena nego fizička rekonstrukcija ili izravni

politički pregovori. Biće potrebno još vremena dok se smanji snaga ekstremnog nacionalizma koga je neizostavno morala zamijeniti građanska opcija, politička kultura unutar koje se kompromis, konsensus i saradnja neće više smatrati slabostima”.

Viši zamjenik visokog predstavnika je rekao da lekcije proistekle iz intervencije u Bosni i Hercegovini uključuju neophodnost donošenja jasnog i sveobuhvatnog plana aktivnosti, kao i korištenje vanjskih stimulansa kao što su izgledi za prijem u članstvo Vijeća Evrope i konačno članstvo u Evropskoj uniji, u cilju postizanja pozitivnih promjena. Naglasio je da kriteriji za prijem u Vijeće Evrope i Smjernice Evropske unije sadržane u “Road Map” zahtijevaju donošenje zakona koji će polučiti konkretnu i trenutnu korist za građane Bosne i Hercegovine. Istovremeno, težnja za daljnjom integracijom Bosne i Hercegovine u evropske strukture predstavlja faktor ujedinjenja u političkoj sferi, koji ima podršku ljudi iz različitih političkih stranaka i različitih zajednica.